

欽定剿平三省邪匪方略

正編

一〇六

新刊三才圖會

卷四

四

欽定剿平三省邪匪方略正編卷二百四十四

辛酉年

三月十六日

壬辰

德楞泰奏言查龍逆竄走茅壩

一碗泉等處盡屬老林道路險仄陰雨滑濘復

有埋伏賊匪若我兵尾追仍係不能施展查左

手雞心嶺一路雖高峻三十餘里

臣

從前曾經

翻越若由此前進可截住徐家壩入楚之路惟
上下懸崖偏橋數處經該處民人盡行拆毀搭

架頗爲費力當有叅將馬應國都司袁陞侯告

請設法連夜辦理二十七日已刻據報修竣但

賊由一碗泉竄去若竟無兵尾擊又恐竄回隨

令已革總兵遊擊銜德英額等帶步兵八百餘

名跟蹤前去虛張聲勢

臣

統領大隊卽翻越雞

心嶺是日細雨連綿更後始抵三岔據報該逆

因雨阻滯仍在一碗泉長壩子二郎壩一帶據

掠茅壩老山尚有埋伏賊匪查三岔一走廟壩

子道路稍寬一走五里壩崎嶇萬分步行亦須

攀援前進一走六桿溪翻山稍遠即可繞出二

郎壩

臣

令賽沖阿溫春色爾滾等帶領馬步兵

勇由廟壩子前進令馬瑜蒲尙佐等帶領步兵

由五里壩前進

臣

帶領阿穆勒塔侍衛達勒精

阿等由中路走六桿溪爲兩路策應二十八日

天氣晴朗三路官兵前後齊抵二郎壩據前隊

哨探千總史定川等拏獲賊探李尙文等三名

訊稱賊已由一碗泉長壩向西前竄前營僞元

帥唐明萬帶馬隊七八百人步隊三千餘人中

營僞元帥李顯必帶馬步隊五千餘人已過和

岡溪不過相離十餘里後面老林內還有埋伏

一千餘人怕官兵趕來斷住後路等語

臣

卽帶

兵直趨和岡溪適賊匪前營中營業已進溝順河上走後營之賊正在攻撲天平等寨遙見官

兵卽翻右邊大山奔逃

臣

令賽沖阿溫春色爾

滾等帶領步兵翻山追剿後營賊匪又探得老

林埋伏之賊尙未出山

臣

恐其乘空抄出我兵

後路隨令副將達自祥等帶領兵勇在和岡溪

溝口扼要堵截

臣

卽帶兵接續進溝溝內兩山

夾峙河水洶湧賊匪擁擠不開我兵分力攻殺斃賊七八百名該匪等愍不畏死猶敢抵敵時成都佐領練勇巴圖魯歡福斃賊多名箭已射盡四川都司賈紹復外委鄭起高俱以力戰陣亡

臣

督兵掩殺賊勢愈形潰亂有馬步賊匪爭

先奔竄者有徒手扒山而逃者有跳河淹斃者

臣

察看光景其中難民居多卽傳令侍衛兵勇

等凡手無器械及婦女幼孩俱係被難百姓不
准殺傷維時賊衆紛紛丟棄刀矛者一千餘人
盡皆俯首就縛

臣

當令賽冲阿温春色爾滾等

帶領馬步兵勇追剿奔竄賊匪賽冲阿等正當
痛剿之際前營賊匪聞知中營賊衆被剿竟敢
回頭飛奔前來救援賽冲阿等帶領東三省馬
兵奮力馳擊斃賊四百數十餘名生擒六百餘

名嗣據探報後路老山內埋伏賊匪已由一碗

泉出我兵之後

臣

因恐達自祥等所帶俱係步

兵不能痛剿當將溫春調回同阿穆勒塔等帶

領馬隊二百名馳往接應達自祥等業已與賊

接仗時總理糧務候補知府徐兆伯候補縣丞

羅應庚候補典史李培秀帶領鄉勇護解糧餉

亦抵該處卽有騎馬賊匪數名往前直撲廣東

叅將堅勇巴圖魯唐玉龍卽單騎直入箭斃賊
匪二名猝被矛傷陣亡典史李培秀被後面步
賊鎗傷陣亡適溫春阿穆勒塔慶昌等帶領馬
隊趕到慶昌首先衝殺箭傷賊匪數名德英額
帶領步隊兵勇亦由一碗泉老林尾追前來兩
面夾擊殺賊三百五六十名生擒二百餘名餘
匪四散翻山而逃其馬瑜蒲尙佐等帶領步隊

追剿後營賊匪翻越大山三重又殺賊三百餘
名生擒五百餘名時已將暮當卽將各路官兵
撤回至凉水井紮駐此次各路官兵共殺賊匪
一千八九百名生擒賊匪及大小男婦李大文
陳會武等共二千三百餘名口獲旗二百三十
四面大小礮七位鳥鎗刀矛千餘件騾馬共四
百五十七頭匹

臣

因賊匪被剿之際渙散藏匿

者甚多二十九日派令各營將備帶兵四出搜捕陸續又獲犯三百四十餘名查獲賊內有正賊自行割去髮辮假充難民者一時驟難訊辦

臣令難民內老幼男婦遍加識認指出偽總兵

趙志成偽先鋒包萬才戴世榮探馬頭萬全楊盛良旗手宋仲效阮成貴鍾祖望周光明等九名並老賊戰手蔡於明等六百八十九名訊據

僉供原有一萬二三千人今被官兵緊剿不敢
過湖北去想逃到老山裏來仍過陝西不料大
兵乘雨猝然又到殺傷逃失大半等語訊明後
將僞總兵趙志成等九名臠割致祭陣亡之唐
玉龍歡福賈紹復鄭起高李培秀等以慰忠魂
其夥匪蔡於明鄒建禹等六百八十九名亦卽
正法大小男婦難民除釋放附近之王明高等

二百五十四名口外其有陝省難民王廷魁等

男婦一千九十七名口川省難民何士龍等男

婦六百二十一名口均應釋放此項難民若不

妥爲安插必致流離失所或又去而從賊於剿

撫事宜大有關係是以

臣

卽就近飛調大寧場

遊擊劉貴朝鹽大使米喬齡酌帶兵勇前來將

難民解赴大寧縣交收又恐該署縣鍾蓮一人

辦理難周復飛調署夔州府鄭成基督同該縣
查明隸川省者分別遞回各州縣妥爲安插其
隸陝省者造冊委員解赴興安府分別照辦
亦將兩省難民造冊分咨勒保陸有仁以便查
辦再查二等待衛慶昌素爲奮勇茲又首先殺
賊多名尤爲出色之員可否仰懇

聖慈量加鼓勵又叅將唐玉龍佐領歡福都司賈紹

復外委鄭起高等均係打仗最爲得力之員陝
西候補典史李培秀幫辦糧餉亦著辛勤茲因
隨營入川猝被戕害情堪憫惻籲懇

鴻慈賜予卹典至此次打仗遊擊馬元千總李輝林
外委岳增藍翎甲兵奇成額均受石傷守備黃
鳳把總張萬林均受矛傷俱不甚重尙有陣亡
受傷兵勇數十名容俟查明另冊報部辦理現